


羅念菴集


十一




漢書門類			
一〇	四	三五	號
一	六	函	架
冊			

內閣文庫			
三	一〇	四	漢
七	三	五	書
函			
架	冊	號	類

內閣文庫			
番號	漢	10435	
冊數	8( 6 )		
函號	317	20	





念菴羅先生集卷之十


祭文

告衡山白沙先生祠

淺草文庫

土

其自幼讀先生之書考其所學以虛為基本以靜為門戶以四方上下往古來今穿紐湊合為匡郭日用常行分殊為功用以勿忘助之間為體認之則以未嘗致力而應用不遺為實得蓋雖未嘗及門然每思江門之濱白沙之里誠不覺夢寐之南也巳而聞先生之言以未至衡山為念至死而猶不忘蓋雖未嘗出戶然每思祝融之巔紫蓋之上誠不覺神爽之西也此來獨居自懼無友於是出遊三湘之上蓋雖未



嘗近先生之所居而已得先生之所未至然又思不知所謂至死而不忘者果何所爲耶悵望於七十二峯之間無益也先生之祠先一年而成其之遊後一年而至豈果有待也耶又自思力弱志卑恐不足以承之也先生其啓之否耶

祭魏莊渠先生

嗚呼自道之喪學日以分或執私見或泥空文或雜異端億說紛紜門開戶列反躬未聞於惟先生幼抱偉識遠世背俗凝然特立絕去多藝斂精蓄力聖賢我師所志惟一謂人之生有欲有知辨察弗密學其始而天根天機動靜弗離虛以精義靜爲動基不勦衆言不由師授寢處食飲是圖是究四海多賢昔予云邁惟日孳孳莫若其右洪先辱教敬如著龜論與考訂事必箴規跡雖少違心則弗移每問安否卜世興衰音問幾時悲風忽動山川伊阻莫致一慟千里戒途三年升堂匪德之懷惟道之傷嗚呼

祭先師李谷平先生

嗚呼天於斯道常默維持既顯其精必振其衰苟載籍之微不傳則生先覺以覺後知江門日遠俗學澆漓繩趨尺步者多迂濶以相視而分章析句類習爲進取之規雖以舊學宿儒號爲通博者猶未得其肯綮孰能不由師授闖千古而獨馳於惟先生間氣所

尸遠識雄志剛腸瑰姿雖啓源於玉齋之倡率至其  
一言終身確然不變而深造直詣必涵泳於道涯者  
若天縱其步而神昇以私故不知者以爲簡於泛應  
樂於無爲不計情變不虞誑欺其知者亦惟見其壁  
立萬仞而千夫莫撼不苟一芥而千駟莫移處寂寞  
而不怨在溷濁而不迷無黨與而自植非世俗之可  
羈交不阿其所好禮不妄有所施義之所安犯人言  
而莫恤情有不厲假一盼而猶有忸怩望之疑峻端  
重有如喬嶽就之則怡然盡醉而鄙吝之化不覺冰  
釋而雲披故歷窮遭變處人所不堪而笑談自若  
視榮名好爵其得也若適然之遇而邈無前期固少

成而若性雖聞風其可師此其有足述者皆形迹之  
似也而不知其難及者則立命之基蓋凡世情之所  
甚欲而不可必得者未嘗一入于念而以聖賢爲可  
必學所謂千萬世之上下此心同此理同者則篤信  
而不疑慨惟此日談學多岐妙解者每先入于所主  
而茂脩者矜一節之高竒不然則各持門戶或有待  
而興起不然則自成論說冀來世之有遺求如自幼  
刻厲絕類等夷不求成章以表襟自任甚重而不辭  
則當今之世足與配者其伊誰故有心之所得口莫  
能盡而意之所指人莫能知然視人之不知漠然中  
無所動而古人之語有能達吾意者不復增損矯飾

而有事于發揮此非惟二三子承面命而耳提者莫  
肖其分寸雖家庭內外日與俱者亦或未能深察以  
為若斯蓋平生所宗在濂溪無欲以學聖而延平之  
墮然若田夫野老惟身有之故常口誦而心惟洪先  
失學罔辨妍媸曩歲丙戌奉先君之嚴命偕我同志  
獲執業而就鑪錘閑邪求仁惟人秉彛既示蹊徑復  
指瑕疵始識有生之大萬有不足以易而父母之生  
我者必如是而後罔虧自是稍有嚮方不敢置身於  
不義實惟罔極之德雖聚散不一而聞聲歎受箴誨  
者亦十有七年于茲痛惟始也懷聞芑而領畧及其  
繼也持議論以支離虛聽言而未聞道類枵腹而觀

桑願逮至近歲始悔莫追方回首以瞻遡阻山川其  
遠而聞朝命以待次慶厓羸猶可醫計歸輶之在  
邇奉拂拭于臯比當默會于意表庶微隱之可闕懲  
多言之躁妄夫異見之夸毗究時習之所在日俛焉  
以孜孜隨童冠以風詠樂天性之恬熙悵後遊者咸  
不及門而塊獨處者幸異聞之我貽夜夢寐而攜手  
朝跂足而望之將謂世無鳳鳥幽人貞吉豈意歲非  
龍蛇而哲人告萎倏然返棹桐水之湄不見繡裳乃  
見總帷既失聲以長號復拊心而自悲縱昊天其見  
奪胡不忍期月之少遲而今而後有悟將孰與開其  
肩鑄有惑將孰與正其著龜豈天罰吾過而示譴亦

天愛吾道而靳與之資遺行可憶至言有裨期竭才  
以追影憤苦難于後時既宣情以相控矢斯志之無  
墮耿明靈其不昧尚翼行而啓思俾眇末之有成亦  
輝光之未垂德何時而可忘徒仰望而涕淚湛空觴  
以薦誠聊泄哀于片詞

祭楊文襄公

邃菴楊公既卒之若干年 今上用所司議節惠易  
名 賜謚曰文襄舊之出入門下者感公身後之有  
遭也俱各撰言相吊且寓追慕之意憶嘗道曲阿訪  
毘陵與唐應德氏論公平生唐謂某曰世以多欲病  
公亦孰知其廉介者某曰何曰聞有故人餽寶珠一

羊受之客既退分勞左右投之地頃刻立盡而門生  
有以貧歸者發囊助給率數十百金爲常夫爲天下  
用財而不以私蓄即比于一芥不取可也非廉介乎  
某聞而頷之輒應聲曰世亦以尚通病公又孰知其  
方嚴者唐曰何曰先君宿其塾暇故也爲武選郎八  
年出之守郡曰此地不可無此人不知其抑也又三  
年轉而備兵徐州曰此地不可無此人不虞其淹也  
夫爲天下用人而不以私惠即比于一介不通亦可  
也非方嚴乎唐聞而頷之嗚呼世之追慕公者亦嘗  
聞此兩言否先君承公訃泣連日曰公固愛我其忘  
抑與淹者不以俗人視我也嗚呼知公者不必盡形

之言能爲言者或不足以知公知不知於公何與世道之升降係之矣公如聞言其亦頷之否乎嗚呼

祭友人林東城

嗚呼澤蘭弗采美人孔懷胡之焚蕙薦而等化爲塵埃荆璞不售則足者哀胡圭璋清廟而猶不免於毀積之灾豈用舍之於君子皆無所與而禍福之在天者固有不可必其去來也哉憶余再仕適子初第氣和且平質溫而惠言若孔傷行不矯戾學以無意爲宗道以同人爲至南宮稱爲得人銓曹倚以論士當是時也余與相知數子亦且以議論酬資過失砥礪而謂終身可恃以盡友朋之義者也再見維揚子欲

此上海陵從遊夜月過訪各出肺腑指摘慨慷植學務密植善務廣出口入耳期予不爽別去數月京國見枉驚喜若狂荅問如響我疑子剖子論我賞以爲將來歲月皆可共事於鑽仰者也孰謂論交方殷而吾以罪去去未踰歲而子竟購疾以至於長往也哉嗚呼世方尚通子能春容人方忌功子能謙冲然事有不得自專與意有不能盡從者固亦未始不拂于中以其中之有所拂而又夙夜在公以勞其躬則子之不能久於世者豈盡數之窮哉吾是以悲其出處而歎其遭逢也且子之出不皇將毋期得升斗以奉朝暮顧使垂白哀號道路淒楚以子慈仁愷弟宜爲



神之所與而其終身猶有不能盡覩則凡骯髒跌宕  
氣質不逮於子者又安所比數耶嗚呼嗚呼今子已  
矣孰屈孰伸所未忘者在後之人不可得見豈可得  
親朋友之義百不一陳將何酬之各敬此身庶幾幽  
冥聞此悲辛

外父符翁合葬祖奠

嗚呼哀哉古云至剛是剛匪物金鐵可鎔正則不屈  
不屈維何義有是非人則雖殊其辨同歸翁之方仕  
引繩就尺畸窮穴奸以祐以殛四十為郎出入省邸  
平權剔蠹結紛乃理誰其仇之中人之子扣關不聞  
歛跡田里翁之再去匪矯且狂伸我元功讐彼西羌

判不可槌國是以彰寧嗟饑渴溝壑靡忘翁之守  
踵孝肅故寇恂一再借叔度歌暮方其卧疾猶人寔來  
奮臂署辭武夫心摧司臬名藩晉大廷尉色怒人驚  
言溫衆慰營無驕將獄寡寃民力犯群猜默體 帝  
仁惟 帝曰咨咨爾大理不黨以欺朕用嘉爾計將  
大昇孰忌而止伯問之命惟僕臣視晚節戒得急流  
知止翁之既退杜門掃軌坤乾研易朱墨評史天官  
堪輿諸家百氏歲有記錄門絕投刺不出戶庭何有  
城市矻矻儒生或不逮是年在耄耄步健視明與寐  
以時誅歌太平自謂天壤何樂可易時召諸孫授以  
禮式問之中饋所不皇恤亦惟淑人克勤內職田盤

婚喪不獨飲食心何有亡身不踰闕撫幼御卑嗚嗚  
戢戢不識所生惟恩是泣 天子念功及臣之私再  
命來崇象服是宜進之秩號褒以美辭淑人敬承勤  
儉不移亦惟我翁刑家有宜翁擇交游先君締好女  
于洪先忘其不肖長而侍側胥保誨教比幸賜第翁  
在節廟縉紳慶翁翁為色笑且曰斯人可勗遠道彤  
墀趨曉策騎隨車退食有言匪詩則書翁歸十載洪  
先罪斥閒居暫違似物有失虛往實歸坐或忘寐言  
不及私所賞道義耳目傳記揚確紛紜圯族拂常厭  
不忍聞警報恩條凶良登敗憂若在位不間內外如  
是累年曾無二態丁未之冬倏遘厲虐後容正襟謝

醫藥曰命有拘更復何待執手相呼後晤弗再嗚  
呼哀哉謂翁遠逝既壽末年謂理宜然胡為悲率豈  
以婚故骨肉者憐皤皤黃髮典刑孰傳矧曰頽風其  
終可誼龍陽有丘翁所自卜時日之良掩珍藏玉惟  
德不孤作配同穀冷冷飄風蕭蕭拱木永訣何從長  
號莫贖尚飭此身期在不辱嗚呼哀哉

祭牟禾山先生

先生抱質篤靜而醇如璧無疵如麟自仁幼而夙成  
唯諾有則微節弗諧中慚動色楚材擢異冀群亦空  
百里之寄歷試以庸湯湯文水來游稅駕訟寡獄清  
邑以休暇庭無羨物野有栖稼孺慕得毋旅逋歸舍

最課歲獻晉之司徒俾王國計將聽訐謨時與才違  
行以全毀孰別清渭獨返畏壘閉門掃軌焚香著書  
經授玄成惟垂仲舒年深木榻客至園蔬嗣服載興  
福履未替令譜方傳些招遂繼嗚呼哀哉不才弱冠  
與衆奚殊片言見賞推轂先驅荏苒居諸尺寸未效  
仰負深期慙焉自悼自昔投野莫敢越疆歲月音問  
聞且樂康意謂天道盈虛相倚畜前必豐利終出否  
訃來何速有涕沾裳豈惟今昔實惑彼蒼自昔含藥  
顏髮且改將來焉知悲往益駭所貴者生在能有成  
倘不其然何異於氓吐哀以辭欲噤不止矢將潔身  
永報知己

祭周生天臣

聖人之道雖至簡易要其有必爲之志而後可以語  
真其志不掩於庸見不奪於流俗者所謂父不得以  
私於子蓋亦自莫知其何因此乃天之與我而孟氏  
所以諄諄也自余談學二十餘年從余遊而有是志  
者四三人耳此四三人之中考其所志無因而起吾  
獨有望於天臣而天臣於四三人之中其居獨邇其  
來獨頻余自以爲庶幾可共以終身也亦孰知不易  
得者竟不可留吾烏能已於撫膺長悲掩泣而沾巾  
也天臣之質忠信慈仁脫然雜慮惟義是遵群居寡  
欲鮮怒與嗔不褻閭室不侮賤貧其於念慮是非之

間兢兢然思必刮磨而後已雖未見其膠解凍釋而  
逆知其將來吾入之機必有會於精神者也於乎今  
復有若恂恂者否乎自與執別維歲之春見余東遊  
飄飄離塵青衿相繫有言未申余顧而笑姑勿問津  
耶事即學以慰爾親竭來五月千里咨詢遇有會意  
輒念曰安得與天臣共茲晨乎端歸自計所望可伸  
何意訃來劔江之濱哀動旅伴聞者首顰感物理之  
聚散恨吾生之遭屯歲月冉冉倏而更新同心謂何  
身跡俱陳淚逐筆下孰知苦辛嗟余此學悟如飲醇  
既悟其然雖死不泯我爲萬物主萬物爲我賓天地  
莫余制庶類莫與倫可以配大古可以垂無垠此有  
生之大命亦聖人之所珍近若得其門竟未卜我  
知精爽之不昧冀有聞以書紳尚默契於冥漠亦何  
恨乎沉淪於乎哀哉

祭表叔周七泉

嗚呼駕風鞭霆凌高厲空此古人之豪雄也而竊尚  
其風守身如處子用世如轉丸此古人之完業也而  
思有之躬發忠孝於君親敦信義於鄉里嘗希陶矣  
而自謂未及其澹靜虛則明通動直則公溥晚慕濂  
矣而自謂未全其功寒暑不遊風雨不赴能保身矣  
而忽遘疾飲食必擇藥餌必精似慎疾矣而忌醫弗  
痛將其屬之天者默有所制以拂亂其常度故存諸

已者雖進取之銳卒莫勝夫氣數之窮嗚呼長途寡  
旅二人相逢其一車摧馬瘖僵仆中道而號呼莫應  
其一望室廬冒險阻而依依無與安能已於赳赳而  
哀恫而今而後孰爲指學之進退孰爲審道之異同  
孰爲久要而上達孰爲冥會於曩空破琴絕響悲山  
水之徒在芝焚蕙歎恨氣臭之不終鷓鴣之原枕塊  
所封死則相從本其素衷履霜慘慘仰天蒙蒙臨穴  
一慟有懷苟通

奠李氏妹

嗟我同胞骨肉惟四仲弟夭亡斷我一臂兄妹聚哭  
聲同情異衆皆哀死我獨失計父母有知日豈能閉  
三人氣稟妹不若弟年時相見常恐疾罹自昔于歸  
一十六歲怙恃既遠積憂成滯及再得甥謂可慰意  
何期哭幼翻令自斃始聞疾作奔問驚悸即爲訣辭  
相對灑涕選方審卜靡事不至形瘞雖危幸脉可恃  
曾未及旬增以眩痺不遠百里求藥城市變起倏忽  
醫噤莫治號呼誰援忍復近視弱息數齡血肉斯寄  
不知人悲所爲何事悠悠昊天降此凶厲顧我妹氏  
淑惠慈懿言若不聞動若有制承尊撫卑曲盡恩誼  
日侍君子温温作儷云何斯人乃令至是父母遺枯  
不終覆庇我顧形影益卑而瘁孰哀此言痛徹心肺  
昨在深閨今成遐棄從此問訊何由可致頓足失聲

妹寧反袂

祭歐陽南野公

嗚呼學有顯晦道有險夷二者相值千載一時憶接  
浙之去魯與隱几而出齊空遲遲乎故域念孰爲之  
提攜迨春陵之感奮啓閩洛之精微或登筵而獨對  
或專郡而分麾言入禍出行高毀隨龜山之召殆其  
一幾幸委曲於權變竟莫拯夫傾危嗣是有作大行  
肩裨自陽明之復起而東南再造於瘡痍斯文天喪  
國是孰資既顛摧於荒裔猶策詬而交嗤先生弱冠  
早自得師閭閻侍側鮮悟無疑當是時也豪傑蝟聚  
議論蜂馳稟承讎難聽者忘疲及其久也通方內外

與時推移洞人情之隱忽總異說之紛披蓋獨有得  
於圓融不測之智而才力贍博又皆足以發之不獨  
四海縉紳讓其步驟即同時儕輩幾能盡撤其藩籬  
而又位在密勿久奉疇咨九重眷注蓋已納之惟  
幄而二三元老亦日寄之肝脾倘其稍延歲月少竭  
心思調停于可否之際引納於和平之歸可使善人  
恃以無恐志士展其所爲則當年傳授不爲虛誕無  
疆宗社固將藉以維持也胡爲乎賜燭之寵方  
渥而鼎覆之哀遽貽繡裳之慕未厭而台坼之占莫  
違豈民生之無祿抑覆載之有私吾不知得才之難  
而顧值數之竒又不知自古竒數胡獨值于間世之

才與夫成功之日而顧他無與於興衰也噫嘻噫嘻  
洪先束髮快觀光儀初入禁近朝夕相依語必劄  
記信如著龜廿年睽遠書問不遺近歲以來或合或  
離默默有懷思報所知道遠莫致欲待來茲望而不  
即如何弗悲每讀夫子拔本塞源之論與真訣初心  
之詩未嘗不三歎而欷歔先生已矣來日可期果能  
無憾於斯否乎嗚呼

祭同年項甌東

嗚呼嗚呼尚忍言乎往憶同第君爲壯夫十年以長  
比屋而居余喜談學辨析陸朱君默熟視弗厭弗俞  
負疴而南君司水符鑿江之上下榻維艫時疫甚熾

僕僕告痛豈無戚友過門而趨君爲心惻時來隸  
薪水是給分廩與蔬或朝就問或午或晡欸欸耳語  
撫床及膚衆畏其染勸勿過迂君弗曰嗟胡是之拘  
人且效尤孰侍孰扶孰汲孰爨病孰與蘇豪猾王紀  
干法以逋逮及弟績既伏其辜彼矚在阨斧喪橐虛  
數萬來賄介以名姝日夕屏伺間露椰榆枕席微覺  
奮起索驅託君閑衛防入苞苴縱忍貧死不爲利汗  
君向鶴翁駭而長吁凡今談學睢睢盱盱考其曲隱  
有氓弗如孰如羅君至死不踰浮沉渙忍豈斯人徒  
後茲莫逆意氣益孚幸其獲瘳酌酒歡娛十有五旬  
乃判征裾不賴仁者必委溝渠厚德未報空此頭顱

亦再離合情親跡踈遙聞宦轍南北載徂巳酉之歲  
停撓見諏劇談晝夜玄潭爲枯綜經錯史鈎玄考圖  
守嘿爲誚期必著書辛亥過嶺枉道山廬信宿不舎  
更出緒餘尺書往來時舉一隅毫髮未契輒見責誅  
力辨性體知止之殊余亦不讓囊傾錙銖塗畛違越  
期之桑榆炎風播虐傳聞不虞拒以福善天道豈誣  
言者三至失聲驚呼身如可贖寧惜微軀孰爲問疾  
如君劬劬方俟襯返長號路衢事左不偶莫致束芻  
君之大節更僕莫敷父子授受兄弟友于視欲醜毒  
味道醍醐古昔是鏡檢點爲奴室無姬媵門絕祝巫  
知希者貴戰勝弗癉載論出處偃蹇崎嶇寧淹卽署  
不媚鈞樞翔鷁嚇鼠老馬隨駒人皆化茅已獨守株  
麾移三郡剡騰兩都庭謝刀筆野頌均輸昔病毒徭  
有梁可踰昔困委積有懸使車迨登藩省益峻而孤  
貪夫在位封豕孽狐亦有疆宗如虎如貍斷搏獰猊  
如揮湛盧氛消海市日靜郊墟楚歌來暮抃舞于途  
粵人飲食祝而後哺凡茲巨細咸足範模使據要津  
定亂訂謨兼收衆美自可枝梧豈無才智轉圜應抱  
豈無文采章煉句鏤背善邇俗曾是弗愚必如君者  
始可謂儒柰何弗慙毀璧墮珠古云難謀殆其信諸  
悠悠後死何益有無念出再造目斷心瞿因悲弱質  
曷異柳蒲九京閔寂百年湏臾尺寸不立與速朽俱



感此盟心君聞否歟嗚呼

祭彭石屋公

嘉靖庚戌冬十有一月某日石屋彭先生以微疾卒卒之七日而其友人羅洪先始得聞之涕迸下將往臨又明日亦病病八越月無一吊問之使哀誄之言石峯劉子問焉荅曰吾意或得相從地下無以人世俗禮爲也俟不往將復臨矣久之竟不能強而東廓鄒子以書期曰十月之七日會葬先生於某地即虞於玩易之堂且發明其所學與所未及語者以告其家之子弟與其鄉里成先生之志洪先聞而涕焉曰吾如先主何哉昔也識其姓名於衡嶽志見其探竒

挾幽囊印以遊以爲曠達之傳也已而聞其行事於荆川子慕義捐勢買棺以逝以爲剛狷之士也已而登栖雲之亭聞了巖之義讀志歸之簡委待盡之計瞻其容雍雍耳聽其言洩洩耳真而不矯達而不肆則昔之所知者未也夫無心於去留者孰知其所休無校於遲速者孰測其所欲而顧可以挽乎而又何以挽乎然吾於先生若不能遠也乃以束帛瓣香自述平生其辭曰

伊余弱冠好古兮覽祝融之遺文考窾崖之秘錄兮駭彭籛之又聞曠懷漭漭弗羈兮吾何藉與爲群懼飛鳥之迷踪兮望衡湘之烟雲過荆川而問政兮得

要眇於唐君理人懷其豈弟兮又內美之可薰舉空  
棺而解組兮笑片舌之猶存嗟余疆里未遙兮胡紹  
介之弗勤返初服而圖南兮扣雲關而造石室方隱  
几之嗒然兮擘余手以尋麓聽流泉而詠歌兮入窈  
窕之幽谷俯魚泳於階下兮采瑤華於高木栖層軒  
而騁望兮候海月之夜澄酌匏尊以相貽兮食沆瀣  
之玄精余乃忘年歲而論交兮將比耦而躬耕聞石  
蓮之啓闢兮欣策杖而來迎既厭世而弗矚兮如去  
舍之逆旅歌挽辭而自祖兮寓簡書於故侶忽邂逅  
於江濤兮舉征衫以爲徵惜瞬息以全生兮誦姬孔  
而含情歛袞輿而弗洩兮持中庸之戒懼儼虛已以  
待命兮似朝聞之有據默兢兢以反躬兮仰君子之  
幽貞慚步履之靡逮兮敢儀刑之遽湮既往者之不  
諫兮期黽勉於茲晨雖一酌之弗親兮終旦暮以爲  
鄰耿明靈其如對兮尚有聞乎所陳

奠亡室曾孺人

嗚呼嗚呼自子于歸以來三十有五年吾以學且仕  
憂且病與子居室者不過數年耳雖遠在數千里外  
未嘗以饋祀賓祭之事一日戚吾之心者以子能知  
吾之心敬承不違雖勤瘁澹泊能久安之誠足恃也  
自吾歸田以來一十有五年吾以講學聚友外出者  
歲不知其幾矣雖遠在數百里外未嘗以取與酬應

念齋文集 卷一 四頁  
之事一日戚吾之心者以子能知吾之心敬承不違  
雖其身甚弱然不易病即病亦不踰日速愈誠足恃  
也三二年間子雖易病吾亦外出未嘗以子之病一  
日戚吾之心者以子命數問之術者咸謂必壽吾方  
以後事委之固不意在吾前也嗚呼嗚呼今歲何歲  
出不及千里別不踰半暮而子不勝病何爲子之身  
可恃於三十五年之間而不少待於旬日術者之言  
第驗於十有五年之前而不見信於今歲豈吾積釁  
多過上天降罰故虐子以困吾耶抑命數本不可測  
吾皇惑於人言輕視子之身耶將子之身固不勝病  
其速愈者皆強起耶可悲也吾每出門未嘗問期今

歲期以七月吾亦漫然應諾相慰藉耳吾出而病病  
而歸正在六月使背不癱癱不甚必且踐諾子或不  
病未可知也聞子得報旦夕邑邑豈子之身固不易  
病吾以背癱病子耶七月之期意在庶子庶子不舉  
旦夕邑邑將爲廣祀然耶抑亦有他危也使舉庶子  
背又不癱子必不病即病亦必速愈是子之命數固  
不當終吾且爲子促之可悲也尋常有往必來告揖  
舟車治裝悉出經紀吾勞子三十有五年之久今爲  
千古之別乃病不知其時樂不辨其宜沒不聞其語  
殮不執其手子其有遺恨於吾否耶可悲也性資淑  
慎動遵禮訓非大病不肯迎醫非至戚不敢見客今

自診視至于含飯一切他屬弱息世光惟有纍纍熟  
視仰天長號而已子其有深憾於吾否耶可悲也耶  
子委命能不吾憾吾出而反顧莫爲之主入而獨處  
莫爲之語吾縱有四方之志其終能愬然耶可悲也  
術者言吾命數明歲當厄使命數果不可測言或不  
驗斯亦已矣不爾則後之視吾者果能如子否耶耶  
使吾之命數幸而稍延爲吾供饋祀節取與守禮訓  
而不違者誰耶其能如子之勤瘁澹泊一不以戚吾  
之心否耶吾亦何恃而能遽忘耶可悲也去歲此日  
授我衣裳勸我酒漿今歲此日呼之不應食之不嘗  
吾之學非老非莊是觸於目而戚於心者方長也子  
亦寧無重傷耶嗚呼嗚呼

除夕奠亡室

嗚呼除夕既至一歲告終人必百年其數乃窮柰何  
半百阨子之躬眷眷除夕不忍忘故人於舊交臨岐  
悲慕柰何一往子不反顧昨歲之除憐子支吾殺牲  
饋祭醴酒具餽投果懷糈童孩女奴華燈采勝几案  
尊鑪今不見子空木在堂總帷高舉乃設衣裳聽音  
逾寂哀聲短長悄悄四壁形影自將昔感歲除齒幸  
借老今子不待有身寧保昔感歲除坐而同牢今子  
不畱有魂誰招他人之室琴瑟靜好我獨何爲對食  
不飽他人之室婦子嘻嘻我獨何辜骨肉仳離一奠

一號一字一弟子瞑不聞我心如沸哀哉哀哉

祭友人劉良溪

古言學聖所貴者資十室之邑忠信在茲士談儒術  
近益紛肆崇虛競怪行毀欲恣惟兄質美恂恂若愚  
獨守所能不入他途蔽障未消防軫未密旦夕兢兢  
未敢暇逸有聞玄論面赤首俯雖無言拒已見色忤  
啓蒙獎懦問友親師不遠千里動踰數時凡我交游  
無問識否片善必咨微疑則扣時亦懷吐默者勃興  
聽言觀貌浮薄可懲性復矜細善於籌畫糾結轆轤  
忽襟怨隙後容一言衆議以平頑悍弗率終用獻情  
宗戚閭里歡呼迎遇彼幸其來此嗔其去藐余不肖

以行觀人聞其措履恨不結鄰訪故東遊累月旅食  
資斧出納惟所徐亟以長事兄視予猶已疾病渴饑  
徒御是紀肝食弗餒地寢弗疲衝炎市藥含涕乞醫  
間關西歸意若慷慨曰其可師夢寐所在毅然復往  
涉江及湖余謂季弟可即汝圖疆以追隨冀其扶掖  
弟病在側憂勞倍昔望望其來與歲月俱匡山鹿洞  
縱意所如忽聞抱疾挾醫而返抵舍踰旬竟莫可挽  
誰爲烹劑如在毘陵誰具舟楫誰依誰憑德之不報  
我何爲心人之云亡悲益莫禁彼穢而庸乃至耄耆  
五十七齡胡遽傾折彼錫之胤既才且明此遺不遐  
託後諸昆悠悠乎天孰知其故嗟復有行將誰予助

欲往一慟不忍就道計必絮酒酌當宿草學之無成  
朋友之羞敢辱知己白首相酬於乎

祭魯梅臺方伯公

嗚呼公擅所長博洽而該譬彼海錯不與世諧秘文  
故實罔遺毫忽思深計遠究極根窟亦有風雅騷壇  
緒承出入何李歸李杜陵馳騁要途闖驚藝苑一時  
名流摩肩推挽翺翺蘭省幾奉 明恩世錫渥澤序  
考溫言載假旬宣荇登藩臬閩浙揚聲粵澳樹烈衆  
多突梯守獨若畏位高忌來時遠身退沉淪閭里尤  
怨弗形閉戶息交出谷問耕洪先何知早辱期待兩  
姓交婚京國同邁歸田以來屏處寡與皓首為期白  
社相許方幸結託遽成睽離素琴誰賞鄰笛堪悲  
月既逾丘壠始就棘人之勞明神所佑惟不沒者有  
子與文公兼其二終當遠聞繼志勤行聯跼而起九  
京瞑目庶其在此每當問業少效初心一觴寫懷恍  
如公臨嗚呼

祭尹生道輿

嗚呼哀哉美質不易具才實難舍是而學百不一完  
道非其資力倍功半才弗合誠中正或畔哀哉道輿  
世豈可常自我得子交誼有光子之淳懿慈柔雅靜  
見利即耻慕義若競孝友天至謹訥性成不欺暗室  
不狎儉人執友怡怡亦閭而諤僮僕依依無忽以虐

念菴文集 卷一  
身已計偕家猶農作謁金屨揮決履不忤始末知學  
鄉譽已聞迨與切磋毅然出群氣以養充事以志集  
獨抱古心一洗陋習崇明海邑坐者賄移衆爲佛然  
已若未知赴險如夷視民猶子凶殘漸歸龐雜可理  
風檣幾傾順命委巴沙城將圯犯議請徙官以憂解  
民爲悲嗟或衛之疆或別于家釋服待次聞薦忌羨  
胡是褊心投之萬里受檄靡怨疋馬而趨蒼山洱海  
載煦載濡民賦弗均更錢視力民產弗豐傳餐損式  
奏能日積侍養歲違有懷陟岵莫遂拂衣雖則負疴  
曾未皇息盡瘁而逝不弛其職名揚北闕位佇西臺  
驛書來召公移告哀官幾再考囊無長物闔郡助喪

羅市號鬱名宦啓祠行省致緋賻卹有加行李初訖  
凡茲列行世或可能務學且篤近復誰曾虚心察微  
改容受善毫髮有歎顏面必見我非益友子自得師  
愛均骨肉信比著龜無體之心一體之義存之則虛  
推之則至我言子頷我往子隨終身相倚棄官爲期  
天胡不仁奪子大速弗待研精弗留表俗豈無良朋  
亦懷好音惟是多岐矧曰同心匪余獨悲恐時昏溺  
一人之灾多士之戚我行踽踽愧負寔多不藉輔翼  
後當柰何得失之微壽夭之數蒼蒼難謀不暇問故  
有弟有子壽考無疆子目可瞑無過徬徨昨聞荆川  
亦復隕墜九京相逢必廁行輩孰憐衰病朝耶暮耶

念菴文集 卷之十  
駭此歲陰非龍非蛇萬物有盡何獨於子惟子在今  
未可以死今未可死而竟失之我病即衰能已於悲  
嗚呼哀哉

祭趙生子良

嗚呼子良子今舍我其何之嗟違世而獨立亦孰憑  
而孰依始取友以自益紛色笑之追隨幾目逆而可  
懷獨身許而弗離將與遊枯槁寂寞之鄉觀溟滓滲  
澆之涯超墟埃而出入處太虛之希夷指無窮以為  
的凌千古而共馳胡為乎天假之資縱其來而忽曳  
於後學幾於悟與其進而竟止於斯嗚呼子良吾能  
不悲憶在乙未執贄旅邸子雖激昂吾猶浮靡還山

以來方藉助啓可否互荅寧辨彼此石蓮栖巖雲瀑  
登閣聽雨青原看雲匡嶽汎鷺渚之春濤駕玉筍之  
秋鶴種種取證默默反觀信此心之無物雖動應而  
靜安玄矩運而中主圓視聽之不干存莫得而何失  
時顧謔以盤桓懷至寶以難捐誕先登而獨往歷歲  
月之幾何曾不易其所尚顧余馬之班如若抱瘵而  
服恙間話言之相投忻群和於孤唱察所行之或頗  
口囁嚅而意恟怍感振轡以騁途期白首以相望豈  
積戾之未蠲類瞽者而失相差蹻蹻其誰憐子不返  
兮川之上嗚呼子良古之清人穢氛遠謝灝氣還淳  
不期而至天機自神寒不挾續食或累旬吾竊謂斯



道有屬誠曠百世而相感子猶以長生為諱欲備萬物於一身彼其有託而逃以權顯真皆儒者之大忌屢雜出而難遵二年而病藥不濡唇將宣節之理踈亦稟受之數屯固不意吾子善養而乃於此有遺論也嗚呼子良持一介不染之操以處貧而掩其介挺萬夫莫奪之勇以無位而闕其名脩身獨善之具尚微人每相狎而未易乎俗明道開來之望甚切時將有待而未試之行心所獨詣賞音者寡既莫為之慨惜志未盡遂聞聲者吠咸相怪以疑驚此吾所以益為深痛而無復有望於相成者也子縱已矣吾何為情耶去秋之杪聚哭尹氏今秋之初哭子永逝人世如此烏用久計庶幾未死致一勿二且報吾子終此大事地下有知相見無愧嗚呼子良哀哉

祭友人李省菴

嗟我與君弱冠論交南禪方塘情視同胞朝誦暮吟師門口義疑就商除見祛同異踰年分袂我出君留屢淹畿試壯志未酬投牒銓曹掌記藩幕省轄寄籌賓筵讓爵出判洛府清聲載馳賢勞視篆去邑遺思綰符名州滇西萬里遠控黑蕃近連金齒象寶玉墨者盈車君守素履庭有懸魚讒夫肆興官評中抑浩歌東歸面無慚色八稔秋社數醉田廬或諮文史或校詩書兒女婚姻宗戚聯締形以老忘憂緣心係

方期壽考同保歲寒顧先棄我乘化冥觀疇昔問疾  
尺牘往復手跡若蠅心事盡暴寧知旦夕遂成古今  
人世倏忽生者愴心惟君剛正負氣寡合一室經年  
囂塵不納惟君簡重動必豫防行不踰里戒甚垂堂  
惟君嚴家外內斬斬室邇無嘻門設而掩惟君嗜古  
亦慕鐫辭常恐虛腹一物不知惟君好賢禮意周備  
適館授食行如始至惟君飭已不滓瑕疵比閭畏憚  
頽風有裨胡不久延溘然傾逝奚獨余悲一鄉之診  
病衰謝客未對溫容使來見枉期以杪冬良覲難申  
美言弗踐牲醴空陳匪燕以奠我年復幾知舊無餘  
君則已矣後死何如嗚呼哀哉

祭同年程松溪少宰

嗚呼哀哉骨肉聚散之靡定禍福來去之無因紛然  
莫究出而愈新此乃世緣恒變氣數多屯吾宜無惑  
於兄之身也獨其惇恂內持和潤外契能見信四方  
而或未孚於一門惻怛之懷援引之計凡在知愛蒙  
幸既勤而父母妻子柳車未荒曾無動於旁睨豈理  
之常卒不可恃而人之情乃若是其相戾耶洪先所  
為拊心長號而不能已於隕涕者也憶獲聯第始接  
華裾兄質堅盛弟病羸虛旦夕顧語寢食何如文義  
指助禮節數䟽久要是託寧計終初竊不自量傳述  
師說獨謂非迂交警作輟千古相期百行敢缺形有

念菴文集 卷之十  
分睽心無差別洪先倚兄不啻手足之真切也當時  
二姓一樂具并兩翁世誼如其所生通家敦好土物  
交呈趨庭相對美如徐卿亦有孟光揚其休聲洪先  
視兄將謂福澤獨厚其生也胡為乎升沉倏更俯仰  
莫睹情甚子平嗣同尼父學以困進境與情迂故舊  
飄零不復群伍後之參辰在昔車輔痛瘳在吾孰為  
摩撫兄有急難孰禦其侮豈不爾思山川間阻幾歲  
一書不入庭戶嗚呼哀哉此亦不復為兄訴也金櫃  
校史玉堂揆文罷為遷客生入鬼門鳳林之政俎豆  
爰存省即議正國師道尊六館俊乂肅稟訓言綰綬  
蓬瀛持衡雲闕事攝宮揆詞承 帝曰晉京久移短

朝發禡服言還閉門謝謁兄之出處亦既明偉而  
矣兀矣早歲風致脫落少羈一變反朴動必繩規指  
天自矢隨地有裨義形于色人諒其資寧抗而固無  
卑以隨考履始末如兩人為兄之據守又且周詳而  
坦夷矣嗚呼哀哉孰謂兄之身後其狼狽一至于斯  
使慈孝如兄謹厚如兄家室仳離竟莫能自知耶嗚  
呼哀哉縮足訥口鄉稱善士割愛廣施衆譽必侈友  
昆睦族繆庾遐軌守職奉公百僚是視明學育才澤  
宮宜祀兼是數者不易倫比實邦家光豈獨程氏六  
喪纍纍鮮為穎泚孤啼幼號繞棺環儿生也未皇饑  
溺在已死也誰憐坏土不被天平何心弗吊凶否嗚

呼哀哉洪先衰疾伏枕而傷屬纊何辰卜吉何鄉絮  
酒空懷麥舟莫將獨餘耿耿此心未忘維栢泉氏同  
袍所望終此大事謀當允臧為善必報兄無傍徨兩  
歲何歲降此大殃荆川永逝方洲久亡皆未可死且  
少而強矧此弱軀理寧獨長嗚呼哀哉身莫可贖言  
猶在耳援往責今深負知己尺寸未效雖死猶耻誓  
將來日持見君子兄如有靈諒其衷底豈忍聞其止  
於是而已乎嗚呼哀哉

祭周簡肅公

嗚呼負世道之責豈易評哉慮不遠者苦謀身之寡  
術志不堅者病擇術之未精匪乘流而終靡或化茅

而倏更惟公子立如性夙成謂衆美之難備思一  
其可名將與博服而鮮效毋寧守約以常羸故其持  
已也繩趨尺步曾無輕隻履之誤蹈其居位也銖積  
寸累未嘗躡半階以取盈是以八轉而不離即著十  
有二遷而始列上卿世方尚通甘淹滯而不競於進  
人多疾固處溷濁而不失其清行高無毀寵至不驚  
嗚呼謂斯土之幸得公為重增高深于山水何斯世  
之不幸失公大遽亡典刑於簪纓然則今日所為悲  
傷者豈直衆人之情已耶洪先戚連外氏視公為兄  
征輪同啓亨衢異行望令業之彌章慚妄見之何成  
寂含藥以掩戶阻執紼于佳城遙陳辭以抒哀抱幽

懷而怔營

懷而怔營... 念菴文集卷之十一目錄... 懷而怔營... 念菴文集卷之十一目錄... 懷而怔營... 念菴文集卷之十一目錄...

念菴羅先生集卷之十一目錄

土

雜文十一

吊大義塚文

代雙江公禡祭文

橙溪嘉會堂上梁文

俯清樓上梁文

桐臯芸館上梁文

遶翠山莊上梁文

玄潭雪浪閣上梁文

秀川羅氏祠堂上梁文

桐江水次倉上梁文

新居上梁文

石蓮洞正學堂上梁文

念菴羅先生集卷之十一

雜文

吊大義塚文

正德初逆瑾專權播虐郡縣更多以賄進公然肆推  
 刺民窮無告往往化為盜賊日冀交豫楚以南所在  
 山谷多變服應之臨吉撫三郡間為鰲溪大池時源  
 諸處介深林絕澗中道路四塞去城郭多者百餘里  
 賊首張元二鄒仕興等恃險遠嘯聚數千斬竿為矛  
 懸巾為幟狼跳虎噬赭廬屠村以晝為夜莫復誰何  
 蓋自丙寅迄庚午中無寧歲郡邑懼罪匿不以聞履  
 橋張氏居廟口當峽阨地賊往來必道其門固已剝

上

目會張氏以狀上縣縣答罵之曰鬼蠻何地無賊獨劫汝耶汝家乃金穴也已而上之郡郡答罵如縣賊聞郡縣語日夕急攻張氏張氏乃移其女婦歸外親選諸少年習鈎挺礮環守之以是數被攻不能克賊乃遣間諜故以詭言相憾且報期率又不至歲餘張氏以為給已守者益懈女婦老弱不勝竄苦稍稍求歸因各出金為樓高廣數丈計外固以甃度賊至懸梯聚其上計得自全不復設備賊偵知其然率其衆三千襲之候鷄鳴來圍數匝垣火起乃覺少年倉猝求鬪具不得欲逃不可乃驅女婦老弱登樓而自為巷戰戰不利退保樓或突圍走已而風迅火熾迫

樓樓中人戟手罵呼天痛哭聲聞數里里中人遙見弟揮淚頓足莫敢抹頃之樓且火婦持姑子女牽其母入火死無受賊逼辱者凡三百人有奇先以事免者百之十而犯圍出者再倍之得完室家者纔六人正德癸酉八月朔也張氏故富貲畜室廬六七百間呼吸就燼日晡時賊始退外歸者哭求遺骨猶見灰燼中隱隱母抱子扶得燼骨六十餘石有循徹者捐某山為塚治大棺斂葬焉而自詭服上變會省適都御史陳公金奉 上命討江西諸賊聞訐大怒檄奪縣令俸以憲使某督兵殲之又幾月張元二鄒仕興俱伏誅禡縣令職張氏歲以八月朔設墓祭且割

田供事凡十幾畝後三十餘年為嘉靖丁未張璞等  
求譜叙于余向余道故如此余讀史見龔遂守渤海  
以教化清簡民不為盜竇儼令新鄭團其民為義營  
盜發鳴鼓無能脫者余悲張氏之族平居不遇遂為  
守以至於變盜起不遇儼之令也以至駢首死若是  
酷也哀哉未豐湯鉞名其塚為大義余為文吊之文

曰

胡群生之不辰兮四星皇皇紛銅墨之懷贖兮莫庇  
爾良妖氛起而昧忽兮挽捨肆殃豺虎競其虓勃兮  
磨牙矯強白晝袵服道周兮指困為糧殫人不啻剖  
腹兮鋒銳莫當亟扣閭而止變兮覆謂我狂暗抑抑

而沾危兮制義以方美總總其旦盟兮莫之避也秉  
鉤棘以趨捷兮何悍鷲也且熒熒其列炬兮昏曉備  
也塹深障高以阻艱兮窮技智也夫何聰之不遠信  
巧謀兮糾錯相調意厭浥兮守者更怠歲月接兮間  
投毒作被迫脇兮始攘攘而奮袂兮逞決一鬪破局  
環柱呼群兮距前翼後矢不及發刃莫援兮凶已突  
而余就裂齒摺脇不悔兮更升榮而自牖鬱烟熖以  
燔灼兮擁戶號穹雲屏屏而弗雨兮風獵獵而扇融  
烈金精於百煉兮干將為雄芳蘭熄而氣馨兮玉受  
炎而氣白虹撫媼媼之啼女兮子躑躅而齧母抱孫  
幼以連捲兮姑束縮而從以婦胡昊天弗余吊兮白



日避而下走凶遠逝而反盼兮室既赭而塵上覆拂  
蒙翳以求遺兮恍若見之形不啻而冤結兮陰曠四  
垂啓下宮以聚處兮與化相推歸混沌於一體兮死  
而不離嗟夫人身憂疾悲天計年以生惟日相保黃  
馘槁容哽噎是防亦有弱息戒在垂堂胡爲乎一炬  
之間百口俱燼彼亦何辜聞者其忍義甚於死死獲  
所安柰何民牧竊位而殮夜沉沉兮霜苦寒魂寂寂  
兮無悲酸穆皇風兮清道秋月皎兮來還

代雙江公禡祭文

伏以聞鼙鼓而思戰 聖王重疆圉之臣御尊俎以  
折衝賢將本詩書之士大明無外曲軫包荒小醜何

不敵行犯順

皇仁赫其震怒師律畀之眇躬遠

天威斷資神授言念其潼關謝事白水樓直壘網三  
十年曾備嘗險阻艱難之態道經五千字已無觀翁  
張取予之文每鼓腹而忘形勞因鑑貌而懷戰勝何  
期輿論竟動 宸聰出常格以訪山林假中丞而分  
節鉞九關夜啓喧傳一騎之飛龍千里風行特下八  
行之優詔東連黑水外控白狼孤竹盧龍首瞻方鎮  
神州赤縣咸入撫綏俾釋耒以即戎殊違志願念宵  
衣而肝食忍緩馳驅方祖帳之朝臨望靈旗而禡祭  
齋心徼惠矢志宣忠伏願眷祐聿隆神明默啓衿袞  
生之離患幹二氣以除氛河鼓降精錫玄符而佐命

地橋發秘遇黃石以成功知出萬全筭收百勝令行  
陰慘有北盡豺虎之殺時定殺機在陸無龍蛇之跡  
玄戈遙指電掃霆飛胡馬逐奔風聲鶴唳問風俗而  
憑熊軾塞垣免烽燧之虞戴干戈而包虎皮燕市飽  
酣歌之樂式光景運未荷寵靈

橙溪嘉會堂上梁文 甲午

伏以無地起樓臺早慕萊公之事散金與親族深慚  
疏傳之賢雖闔門共爨未能幸九世同居可樂一新  
衆宇相與合歡顧瞻盤谷之中實據桐江之上橙溪  
匯碧岫嶺環青諸峯羅列似兒孫可登高而作賦三  
月烟霏着楊柳足騁望以怡顏登舟不減輞川

如遊嶽麓門庭三五步有田可耕有水可漁江村八  
九家入山不深入林不密雖無嘉木美卉之景時聞  
行歌互答其間惟茲地之效竒未爲人所物色昔我  
祖也見而悅之山之下居焉百有餘歲矣當其開荒  
三徑不過栖息一枝瑞竹軒中常有四時之色鳴琴  
亭上每高千古之心蓋啜菽飲水亦自欣然非離世  
樂道不宜有此是以後有興者咸謂天必報之爰自  
高魯以來世爲清白之吏銀魚墨綬曾典邊隅象簡  
金章屢持憲節惟念朝無倖位故皆國爾忘家日益  
有聲地不改闢羅君章階下蘭菊叢生蕭相國歸來  
垣屋不治鄉里稱長者可以貨取乎居第傳子孫至

今存可也門閭欲大物數自更時當革鼎晉升歲轉  
辛壬癸甲殷邦嘉靖惟十有三年春洪範稽疑卜三  
龜一習吉營宮室先祠堂已有棲神之所合族屬序  
昭穆尚無趨禮之庭吉日兮辰良應時而事集有力  
如虎運斤成風敢云肯構之材聊畢結茅之願堂名  
嘉會蓋主就東階客就西階可以退讓而成禮亭扁  
儼思必男正外位女正內位然後動靜之有常宮墻  
高不及肩廳事僅容旋馬後世師吾儉得此亦過矣  
先生自此升於我何有哉一畝之宮環堵之室君子  
之藏身待價有如此者八荒為闔天地為度聖賢之  
廣居大道又何加焉從此卧白雲招黃鶴儘可徜徉

不待吟紅藥對紫薇始稱貴達古人有空申樓閣  
朝見壺裏乾坤但可避燥濕暑寒不願乎外惟其塗  
塹茨丹矚在後之人凡我同盟聽吾善頌

東 桐江江水接長空流沫回瀾觀道術他年用  
此洗群蒙

南 南山倒影入澄潭深夜孤舟弄明月魚龍還  
起聽清談

西 橘刺藤梢路不迷已買青山一片石不須更  
問武陵溪

北 百丈崆峒攀不得寄言猿鶴莫移文山靈自  
此生顏色

念齋文集 卷一 六  
上 萬里雲霄無礙障凡事皆可對人言此心本  
是如天樣

下 風雨不來君莫訝能令寒士足歡顏還有萬  
問之廣廈

伏願上梁之後地因人勝天與我時儒其躬儒其子  
儒其孫一經之教有所試矣王之義王之道王之路  
五福之錫豈欺我哉富貴福澤將以厚吾生長幼尊  
卑誰與爲不善以嗣以續有猷有爲爲問學者接踵而  
來悔過者望廬而返爲子必孝爲臣必忠不媿居一  
峯先生之郡以數則過以時則可尚思衍豫章夫子  
之傳

俯清樓上梁文 壬寅

伏以空中樓閣品題敢擬前脩物外烟霞踪跡已成  
癖好恨買山之無日苦面墻以多年爰收人棄之材  
聊作天游之室念某質拘孱弱心慕高明幼讀父書  
好賦十二樓五城之句長聞師訓思承七百歲過數  
之傳被緼袍以升堂共簞瓢而在巷自甘鱉屈不羨  
鸞栖架上牙籤盡千年之墳典座中青佩來四國之  
英豪五陵車馬雖不至門百首風花尚能接筆顧茲  
偏久莫遂徜徉素無暮夜之金難擁朝雲之棟掃除  
露地移置風簷尺椽片瓦舊貫不加剝水殘山含情  
有待雲霄漸近可安絕粒之軀風雨不驚聊擬爲巢

念補文集 卷之七 四十一  
之俗時倚闌騁望或歌枕浩歌焚爐篆以清齋洗釜  
塵而招隱觀二儀之清濁余茲貌馬覩萬類之枯榮  
誰為受者月明千里尚思瓊樓玉宇之高寒春色滿  
園無復野草閑花之愁怨路傍塵起去馬來牛天外  
霞飛斷鴻孤鷺歲寒獨守賴三友為相知日晏閒眠  
似一僧之未起座可移而攬秀帽不落於登高惟從  
吾之所求豈知老之將至暫延梓匠不煩畫堵之工  
且逐兒童共和繞梁之韻

東 不說相如四壁空夜半冷風開戶牖恍疑身  
在碧霄中

南 鹿角晴光影碧潭已識無心為道體年年只  
與水雲叅

西 茅屋鷄聲月正低借問此時塵夢裏幾人奔  
走逐輪蹄

北 千峯萬峯望不及紫微夜夜自中天乘槎不  
用探消息

上 八萬四千豈尋丈中間寒暑任推遷不遣絲  
毫牽度量

下 世界誰為具眼者却笑觀場喜與悲主人一  
一能拚舍

伏願上梁之後安居不曠大道常聞弟子忘言常對  
衣冠番暮雪小兒解語莫將談笑傍星辰轍跡漸深

定來長者琴絃未絕必遇知音矢考槃以弗諼終蓋  
埃之未謝大清可俯無極為期

桐臯芸館上梁文 癸卯

伏以環堵四十年初何溫飽古書三萬卷素所珍藏  
偶徙流以飲牛因采芸而辟蠹地鄰南畝可聽歛  
門對北山無勞移檄某寤寐先哲生長太平貌不逮  
乎中材愚莫化於上智早親鉛槧粗窺孔壁之文驟  
玷班行謬作周南之史歌白華以連蹇撫青陽而居  
諸載奉寵光計何裨於宗社旋蒙解澤恩且賁于丘  
園皓首弗諼甘勤四體清時希遇願受一廛念稼穡  
之艱歲不可緩傾松菊之逕日已就荒幽卜林塘工

尋梓匠短簷向煖可冬日以不燼喬木借陰雖夏時  
乎何病率婦子入此室處樂天命將復奚疑流水知  
音識灌園之有道白雲為侶期出岫以無心卜策種  
樹之書賴以俱存金石款識之文幸而遍閱無以立  
無以言趨庭可訓請學稼請學圃侍坐何慚先成擊  
壤之歌共助索綯之力

東 楊柳深林溪水通不用桔槔動機事坐看風  
雨布春功

西 小圃新成草樹齊杞菊開時人易醉杏桃熟  
處鳥爭啼

南 山色悠悠靜與叅四尺長鏡憐暮雪孤舟橫

處見春潭

北 結茅舊傍崆峒側春至寧歌十畝閒年登願

共千人食

上 善惡無私人所仗清獻何勞夜有香堯夫本

是天為量

下 主人原屬無為者已拚身世等蜉蝣肯為兒

孫作牛馬

伏願上梁之後人歌帝力世訓三言朝出耕暮歸讀古書下無濕高不苦乾亢藏焉脩焉息焉游焉夙夜匪懈博也厚也高也明也天地同流其水其丘吾所舊遊一簞一瓢終不改樂可傳來世毋負斯言

遶翠山莊上梁文 丙午

伏以衛公子居室所貴苟完蕭相國為家但令師儉顧子雲之耽寂實龐老之遺安雖云舊貫之仍亦以因時而革伏惟主人志甘藜藿跡謝塵埃在畝畝而不忘君能歌帝力知風月之俱屬我更喜農談有先人之敝廬於深山而獨處未能徙突自合移栖畫茅宵綯敢厭親細民之事出耕歸讀亦欲得古人之心偶率眾以開荒因命工而面勢易棟宇之撓折增山水以高深門外寬閒可容五柳室中偈不聊比一枝於此而詠豳風築場納稼或從而邀海月望野尋梅笑談不病於夏畦婦子得親乎春饁食英籬下足延

縱浪之襟懷煨芋爐邊誰識急流之人物未論天地  
之生吾有意且混草莽而與物同春四鄰聞喜以咸  
來六偉齊聲而贊頌

東 此去吾家一徑通縱有扣門來見訪定知長  
者似龐公

西 雲外三峯棟宇齊今日此山真買斷直教高  
枕聽晨鷄

南 竒柯百尺影穆穆材大言天憂無用處也能風  
雨護茅菴

北 崆峒亦是華胥國自古尚人能幾何至今故  
壑生顏色

上 平生有意尋蓬閣何處夜深黃鶴來主人入  
手休輕放

下 擇取良田宜秫者漉酒須尋元亮方葛巾頭  
上還堪把

伏願上梁之後徑草不迷簷花作對命中車而屢至  
共策杖以閒遊人歌大有之年竹報平安之日飲泉  
而得壽考種樹以辨美材未托善鄰終成樂土

玄潭雪浪閣上梁文

丁未

隔三千之弱水空望雲霞擁十二之重樓忽開雪浪  
景非幻現業以緣成恭惟旌陽真人立不易方生而  
密契守專一氣道超無始之先憂切群蒙患在有生



之後謂洪水猛獸實鄒軻之痛心而沉玉負薪乃漢  
皇之遺烈教緣神道身代天工不嗟劔術之踈自撰  
符命之秘遂憐南方卑濕之地蛇蛟結蟠竟使西晉  
中衰之年雨暘時若仁施無告功成不居排闥閭而  
上征絕天漢而徑度雲窓月戶杳莫知其所之桂殿  
竹宮咸庶幾其一遇睹河洛而思禹人有同心迎猶  
虎以祈年古多是禮顧茲捍患敢缺報章芳草萋萋  
徒悲遺跡晨星落落望若待時偶衆欲之樂趨疑天  
後乎善願財能分有役不久勞淨掃緇氛聿興玄宇  
離地三丈許已顯樓臺去天尺五高可輕談笑簷牙  
倚樹虬角如存綠綺映山爐烟未改員顛方趾誰非

子晉之身美月吟風莫誤田公之姓樓頭黃鶴去不  
返此日當還檻外長江空自流故人安在嘗聞五百  
名世豈必盡厲龍沙但得一粒成丹自合同登鳳馭  
撫軒楹而拍手清濁兩儀掩戶牖以潛居升沉三界  
破功名則波濤一瓠識性命則瓦礫千金朝北越暮  
蒼梧吾亦尋真之過客數落花聽啼鳥後應吊古於  
斯文暫將洞府之清歌共對江山而答響

東 曾駕飛虹入海空坐看蓬萊幾清淺故鄉桑  
柘遙春風

西 回首青山落日低鐵笛倚樓吹不斷幾多塵  
夢自冥迷

南 月在青天影在潭記得褰裳曾宿處夜深無  
語枕琅函

北 怪石分剛見神力從此山魈不敢過年年風  
雨閒荆棘

上 斗牛紫氣如龍狀莫道延津劍已飛手中尚  
有青藜杖

下 滿岸雪花晴自灑老蛟切莫作人來神仙原  
是樓居者

伏願上梁之後烟雲作護芝草長春未須問百和九  
華之香方宜作供口口共憶萬遍千周之句何以酬恩  
鼎器須防藩籬無暗杜旁門之他漏封密室而苟完

南去北來心便休念長途之何適今是昨非迷未遠  
惜半世以空捐倚闌干自可點以望天涯莫多下淚  
振衣千仞飄飄那復羨瀛洲長嘶一聲物物俱令歸  
混沌道場不動祀典無窮

秀川羅氏大時岡重建祠堂上梁文 戊申

伏以聖人立廟易申萃渙之文大夫繼宗禮重始遷  
之祖適丘墓者吊古矧曰余所自生得魚鳥則祭先  
可以人而弗逮恭惟始祖大時府君唐風未造楚產  
先民懷寶席珍諸侯不干於聞達運鷗夢蝶大年得  
縱其逍遙西水滸以聿來去銀塘之二舍定方中而  
考室隱戡村之一區二世十三府君里必擇仁家惟

尚義秀川桑梓抱噐猶謹於承祧淮浦旌旗朽貫盡  
傾於佐餉三世十四府君珪璋比介蘭蕙含馨壯志  
出塵嘆割疆於耶律暮齡安土笑返旆於陳橋四世  
豪川府君和感分荆誼存韓萼讓產收裕昆之益克  
家廣納婦之謀五世南塘府君生有夙知富而能訓  
謂詩書莫先善善能孝謹故切親親士可無田捐烏  
陂歲之常稔人當祭祖發伊川心所未言自茲以還  
益昌而熾即改邑而去亦比屋可封濬發啓祥揚右  
閭之高閼克開布烈振空谷之希聲考宣和之鍾久  
傳大雅入淳熙之譜盡號良材三年而大比上有司  
一日而童子聞天下金魚垂綬在館閣爲得人皂蓋

引車作郡邑者特衆若家稱萬石兼腹笥五經苦節  
不感於仕夷忠憤每形乎報主世濟厥美家有其書  
雖顯晦之難齊類華腴之足誦未可更僕而屈指孰  
非先人之一身道與時隆禮緣義起正月之吉國族  
聚斯爰申如在之誠用報無疆之惠蓋宋元明五百  
餘歲而素臨吉數十大家鷄鳴咸興駿奔恐後儀文  
久而大備戶庭至莫能容群望克諧更圖脩集美瑕  
丘其可樂卜澗水之在東食墨于龜有葱其氣遂即  
九京之地載新百世之祠幸鄉人歸我田喜工師得  
大木練時日物土方象生存爲寢門階事可容其步  
武辨內外以藩衛堵觀不止于及看尊壘在榮鼓鍾

于序神龕祔位儼乎常若有臨庖次齋廬退而各得其所至於世傳重器天錫秘文各有攸司存于皮閣物具而遂苟合山高爲之益增不日告成疑降靈之嘿相一陽來復感茂對以反初洪先竊媿寡聞實陪末議顧南山之霧遺澤猶存遡東塘之源結鄰甚邇惟橙溪之開宇始蘭谷之避囂苦心已驗於庭柯瑞氣嘗符於軒竹南交馳傳誰明匪石之心廣海叅籙不易飲泉之志銅符入滇邑丕顯人文象簡靖徐戎克明帝憲或鼓琴而歌解愠或挾冊以動長安施及菲才亦沾餘潤歸田食力頗堪版築之勞讀禮覃恩習聞俎豆之事爰述祖德用續工歌暫代言于梓

人未論相道共歡誥於旌且對兒嬉

東 千峯羅列是崆峒形似執邊趨曉日色如會弁立春風

西 千古衣冠地不迷植樹不須王氏祝遺碑常護宋人題

南 千折紆縈秀水潭采澗愛看蘋葉翠釀泉味比蜜脾甘

北 千畦楓視新田側已能作賦頌椒馨便可躬耕將黍稷

上 千年光景昭靈貺福善從知慶有餘感神端合通無象

念菴文集 卷一 下  
千人舊福時當大多聚圖書談古先豈徒鍾  
鼓分晨夜

伏願上梁之後世思法祖人有多男行不負神明孝  
親敬長者乃敢入教可成子弟歌詩習禮于其間推  
愛已以愛人欣戚必關于同姓使享親如享帝夙夜  
無忝乎所生咸增分簋之光永善式問之俗遠垂世  
範大慰宗盟

桐江水次倉上梁文 已酉

野陳委積實惟富國之藏地利舟車要在裕民之力  
事有久而必復費雖衆而不勞恭逢臺省郡邑明公  
惠衆作新典惟率舊謂役民而轉運當權地以均輸

稼穡實惟艱難水陸可無會計痛顯蒙之入市必講  
幻於多門縱逆挽以奉將莫半償其坐耗繼之信宿  
益見沉浮問糴而後時固虞翔踊權本於易手更冒  
侵牟對刻木而口期持囊金而晝攫欲除羨日須絕  
弊源爰下采於芻蕘肆交騰於剡牘乃申上命仍集  
衆思幸遂欲於天從敢緩期於歲改規畫考夫古昔  
擬議至於旬時倣 國初之成規從水次之便計不  
限以數惟意所安俾臨流以據高得豫儲而待發惟  
桐江屬六一之東境在吉水爲西北之下流冠冕詩  
書擅風聲於半縣謳歌耕鑿受禮教於先民合鄰壤  
五八五九六十都之間凡得金六千四百八十銖之

重或捐產以合美或宣力以要成剪荆棘而構梓材  
接閭閻而開邸閣朴惟聖黜謝輝映於丹青尊比署  
居儼紆徐於繚曲賦幾萬石人受一廛雖斗粟其可  
容不崇朝而即達爭趨負戴聚舞旄倪豈惟得百姓  
之歡心實可垂百世之永利左規右矩子來咸屬於  
工師十雨五風雅語忽傳於里巷暫停運斲小試唱  
籌

東 楊柳陰中盡短蓬舊日米船休借問岸頭已  
有長年公

南 墨潭潭水接玄潭此後長官清似水市人有  
米莫相攬

西 川原林麓互高低催辦不勞人吏下家家森  
杵候鳴鷄

北 司徒駐節章江側不允吉安福軍帳下黃  
頭任相迫

上 願求明府青天樣 朝廷恩德已難酬寬租  
詔令何須放

下 江中米賤原無價此處民淳官要知不用鞭  
笞與呵罵

伏願上梁之後年書大有國運中興山谷不識衙前  
糗稭常多壠上春來江漲官艘似發海陵潮歲久林  
深輿誦堪評汝南月有禪鄉郡且壯江山

新居上梁文 辛亥

伏以仲蔚園居睹蓬蒿之三徑淵明栗里紀歲月於  
再遷豈爲士而懷居聊後吾之所好石蓮主人難  
適用分甘退藏塵網三十年幸迷途之初覺玉階方  
寸地笑春夢以何憑請學老農無踰我里求田問舍  
雖無溫飽之心剩水殘山偶有希奇之遇思棠棣之  
室未遠顧桑梓之地可依從者如歸卜之曰吉蓋南  
方卑濕養生者之深虞而厥土燥剛堪輿家爲稱善  
安猶置器徙無出鄉蟻有移封似欲善乎其後雀能  
占歲可以人而不如伯夷樹歟伯夷築歟敢云廉士  
鮑叔知我鮑叔憐我賴有故人盤谷之車馬頻來北

山之猿鶴何怨擇風氣遺種類敬遵考亭之言相陰  
陽觀流泉因識菡風之業且人棄而我取可朝耕而  
夕歸田家絕四鄰青山真如屋裏江村抱一曲白鷗  
長傍人來小子聽滄浪之歌清斯濯纓濁斯濯足白  
日到羲皇之上饑來即飯倦來即眠門人勿謂墻卑  
婦子率入室處弟勸兄酬及時爲樂鷄鳴犬吠接境  
相聞他日柳樹五株先生便堪作傳深春桃花夾岸  
漁郎休更問津任呼馬與呼牛能爲鼠而爲虎萬間  
寒士付之柰何一廛爲民得此亦過苟飲水曲肱之  
可遂即拱璧駟馬以何加占營室在中星正維今夕  
舉大木呼耶虎試聽同聲

東 芸館橙溪一徑通分付溪邊舊桃李春風原  
在蒲懷中

西 樓頭騁望衆山齊欲識主人憑几意浮雲更  
比曲闌低

南 天畔晴峯染碧嵐莫擬虹橋接霄漢十年早  
已謝朝簪

北 紅塵一騎來京國偃武脩文當盛時直須擊  
壤躬耕食

上 明月清風任豪放縱着羊裘把釣竿江湖誰  
解干星象

下 牙籤萬軸插高架終歲如今學閉關問奇載

酒姑田駕

伏願上梁之後豐年報國多福宦家群居者閤室無  
欺外至者得門而入戶開亦開戶闔亦闔善言無千  
里之遠道陰而陰道汗而汗正氣塞兩間之內讓耕  
讓畔里有仁風學禮學詩庭多暇日空中樓閣堯夫  
何意於品題壁內經書安國可傳其刪述永遺善緒  
益顯文明

石蓮洞正學堂上梁文 丁巳

依月巖而悟王靜元公詣無極之先入雲谷以結幽  
棲朱子大斯文之緒在百工術業尚且貴於專精矧  
千古心傳可無資於游息蓮洞主人質非狂狷竊慕



中行心泯怨尤未緣上達不遑寧處異獲異聞三人  
必求我師四方不忘有事徜徉五嶽涉獵百家啓石  
室之丹書夜窺海日挾秋風之白鹿手扶星河永托  
鄰於太初辭鑿竅於混沌思焉若起近而易求悔多  
聞之見欺屏繁思而自守地不愛寶物有當機偶逢  
巖洞之竒形乂秘荆榛於僻壤未論太乙身寄蓮舟  
空數三峯花開玉井行纔踰里望若層丘金掌凌霄  
沉瀣泫仙標之晴旭碧濤翻海珊瑚間鮫室之明珠  
疑六丁雷斧之冥搜儼九首天吳之呵衛頗投夙好  
遂罷遠遊借風詠於暮春除茅塞於山徑辨種而藝  
木已過十年環堵以爲宮因周一畝梅關待月恍清

明之在躬竹牖披風倏煩囂之去體始知枯槁寂寞  
自與道謀欲爲砥礪切磋當先默識終焉之計遂決  
於斯樂矣何求不知將老愧逃名而未得時好音之  
見懷車轍頻來至無可避戶屨常滿多不能容問俗  
使君嗟其爲異境勸農明府助之以結廬捐俸爲備  
累書相促謂可藉以養士且有契於樂山樸斷  
豈望工師之木旁求版築敢云夫子之墻不出  
可窺天地臯比乂撤非好爲師盤辟遠來皆能助  
詩可言禮可立趨而過庭者咸有聞念則聖罔則  
譬如覆篲也吾自徃睹浮雲之出岫今復何心甘  
水以樂饑于馬卒歲過我門幸入我室塗人誰非

舜之歸讀其書想見其人此身如在羲黃之上業傳  
乎不朽古之配兩間者無多道傳於無言事有曠百  
世而相感適宗族鄉鄰之駢集率門人小子以浩歌  
暫息郢人之運斤且聽堯夫之擊壤

東 千峯深處號崆峒若向廣成求道脉定教思

慮莫憧憧

南 秀嶺層巒靜與叅但願文明啓天下豈妨高

枕卧晴嵐

西 僻塢深林滙碧溪愛惜涓涓常不舍始知四

海即涪蹄

北 松杉影裏藏阡陌從此躬耕不出山却向宮

租酬帝力

上 秋陽皜皜無遮障此是千年孔孟傳不用山


天觀易象

下 六經諸子存高架升堂欲辨異同間只在此

心誠與詐

伏願上梁之後塵器不入道氣常存答問向初平一  
語勝十年之誦讀端坐如明道四時對萬物以靜觀  
求州里蠻貊為可行必視聽動息之皆理敬以脩已  
仁不讓師檢名節以固藩籬當使烟霞增氣色即辭  
章而為羔雉莫教猿鶴漫移文木石居鹿豕游終身  
與深山之野人無異江湖身廊廟志諸生以名世之

豪傑自期世教少裨山靈何幸



念菴羅先生集卷之十一終



